



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 8



Ozüng alema kiyimba ken o nung Khan
aser kinungtsü na nem taitok agütsü

Premier League nung TKR mentor
Goswami Caribbean kümogo

VOL. XXI ISSUE NO. 272 (ADOK 272) DIMAPUR AMUNGNÜ (SUNDAY)

CHITENI (JULY) 14, 2024

₹ 5.00

BJP & NPF tanishirtemi Congress nung aden

Dimapur, July 13, 2024 (TYO): Hokolbarnü Nagaland nung yimtenren lennir aikati Nagaland Pradesh Congress Committee (NPCC) nung denogo.

Yashi Congress nung adenertemji retired Additional Development Commissioner, Nagaland & taoba State BJP Intellectual Committee Chairperson Dr. Temsuwati, Naga People's Front (NPF) Working Committee züngsem Dr. Roland Lotha, NPF Central Youth Wing Vice President

Yanger Jamir aser BJP Youth (BJYM) tanishir Moses R Ovung nunger lir.

Member of Parliament (Lok Sabha) aser NPCC President S Supongmeren Jamir-i parnok Congress nunga aniockba sentong kettangsü agia aser Nagaland atema AICC Secretary Incharge Ranajit Mukherjee den NPCC kettangpurtem aden.

Congress tanishirtemi züngsem tasen ajak pelaa agizüker ta Communications Department, NPCC-i ashi.

CNCCI-i Karbi Anglong CC den ajurutep

Dimapur, July 13, 2024 (TYO): Confederation of Nagaland Chamber of Commerce and Industry (CNCCI) den DCCI züngsemtemi July 13, 2024 nü Karbi Anglong Chamber of Commerce office semdangogo.

CNCCI Chairman Dr. Khekuga Muru-i anir Vice Chairman Aben Ngullie aser Treasurer Mahesh Agarwal nunger den DCCI züngsemtemi KACC den Nagaland aser Karbi Anglong nung shishilembartem

tejakleni aotsü atema onüktem lemsatepa liasü.

Telok anati Nagaland o Karbi Anglong tsüngda shishilembabaren tesentaktep akangshitsü aser inyakyim tajungba akümtsü bangiemtepogo.

Parnokisa anatsülen shishilembartem yaritsü aser khurettem lemsatepa küleme angatetteptsü lenmangtem bushitsü lemtet, ta Media Affair CNCCI-i sangdong ka nung ashi.

TPO obendang nung NZPO madener

Dimapur, July 13, 2024 (TYO): Mapang talangka ashishitepa aruba Kezoltsa/Kozürü/Kazing ali ken o atema Tenyimia People's Organisation (TPO)-i shimtetba Board of Arbitration (BOA) ajanga oshidang ka agütsüba sülen anogo ka lir Nagaland Zeliang People's Organisation (NZPO)-i iba obendang nung madenba metedaktsüogo.

Hokolbar aonung sangdong ka agütsüba nung NZPO president Kevipele Iheilung-ia sign süa liasü saka tanü pai ibaji meyipa agiba metedaktsü.

Pai ken o junga memetetba ajanga Zeliangrong nunger taginüba aser temetem yoka machitsü ta NZPO president Iheilung-ia tanü TPO dangi shidi ka züluogo.

Testüba nung Tenyimia kin 10 indang senden ka nung dena aruogo aser idangji pai Zeliangrong Baudi (Manipur, Assam and Nagaland) president ang adentsüla ta shia liasü. Ajistüaka Tenyimia nunger putepa alitsü mechii nung sendentem nung aden saka pai iba ashishitep aketba ali indang osang tejangja memetet ta Iheilung-ia shidi.

"Mao Council, SAPO aser Maram Khullen ajanga dang Position Paper' agütsü ta ni bilem saka obendang agütsüba sülen ang Ze/Yangkhullen nungeria küm ishika tejakdang ashishitepba tesem nung parnok meyong ali densema aliba atema shidi ka agütsüba metet. Ajistüaka asenok sendentem nung Ze/Yangkhullen yimtsüng onük mebenok" ta Iheilung-ia TPO dang ashi.

Nagaland-Manipur arrtsülen tekümdangtsü olen ka shiogo.

küm 40 jungnüs Kezoltsa/Kozürü/Kazing mangatettep ken o jembia aruba sülen Tenyimia People's Organisation (TPO) nung Presidential Council-i yashi iba atema oshidang ka agütsüba.

Nagaland nung Southern Angami Public Organisation (SAPO), Mao Council aser Manipur nung Maram Khullen yimtsüngtem tsüngda ken o angatetteptsü atema TPO-i iba obendang agütsüogo.

TPO-i iba ashishitep aketba ali asemsü lemsar Mao Council, Maram Khullen aser SAPO nem arrtsü lateta lemzüksüogo aser November 28, 2017 nü telok asemi Arbitration Undertaking nung sign asüba sülen anidaktsü obendanga agütsüogo.

TPO-isa iba ali nung küm 50 tashi forest & resources wazüka ayutsü, gari lenmang meyenglutsü, police barracks yangluba aliba agentsü, telok ajak nungi nübotem dena Forest Committee tentetsü aser Tenyimi Southern Naga tsütsü nungi Dzükou valley tashi tetsüng lenmang agi senzütsü ashi.

Iba obendang nung Dzükou valley densemba ajanga iba tesem ya kin ka mesüra yimtsüng ka meyong lir ta mashir aser TPO Presidential Council-i obendang agütsüba ya telok ajak atema tatembangba obendang lir ta TPO-i metedaktsüogo.

Telok kari danga iba obendanga agütsütsü memulungra aser tetuyu sülen manidakra iba telokji jendoktsü aser TPO züngsem ka ama mezüngshitsü ta TPO-isa tekümdangtsü olen ka shiogo.

Küm 3-4 tsüngda mapa tasen crore 8 adokogo: PM Modi

Mumbai, July 13, 2024 (Agencies): Opposition-i tiyazü osangtem prokshir ta Prime Minister Narendra Modi-i Honibarnü ashi.

"Tawa tu RBI-i mapa dak sendakba report ka sayaogo. Iba report nung tesüba küm 3-4 tsüngda linük nung mapa tasen crore 8 shi adokba shia lir. Iba ajanga tiyazü osang prokshirtem tebang nembangtsüogo" ta PM Modi-i ashi.

"Item nisungtem yagi investment, infrastructure aser development anema noktaker

aser ibaji yimjak nung sayuogio. Linük nung sensotemi parnoki tasa atonga osang prokshiba magizüker" ta pai ashi.

Honibarnü Mumbai nung Rs 29,400 crore shi alanga terenlok mapatongtem inyaktsü lung azünga yutsüba sentong nung PM Modi-i iba ya ashi.

Congress-i Atal Setu apu raksadar ta tai tongloksüba PM Modi-i aitsü.

"Onoki Mumbai nung alirtem sadema lidaktsütsü bilema inyaker anungji Mumbai meketa connectivity tajungba kümogo.

Mumbai nung coastal road aser Atal Setu renemogo. Atal Setu mapa nung tetsükdaktsü ajurudaktsü kanga merangogo saka tang nisungtem iba ajanga ajangzüker" ta PM Modi-isa ashi.

"Anogoshia iba apu nung gari 20,000 shi senzür ta kü dang shiogo. Iba apu ajanga anogo ka nung Rs 20,000-25000 lakh shi totzü kümzüker" ta paisa shisem.

Iba sentong nung Maharashtra chief minister Eknath Shinde den deputy chief minister tem- Devendra Fadnavis aser Ajit Pawar nunger aden.

INDIA bloc-i by-elections takok atema benjungteper

New Delhi, July 13, 2024 (Agencies): Congress-i aniba INDIA bloc ajanga Assembly menden 13 by-elections nung menden 10 nung takok nguogo.

"India nungeri Constitution aser democracy kümzükogo. July 10 nü state tenet nung by-elections agiba nungi INDIA bloc-i menden 10 nung takok angu ta Honibarnü Election Commission of India (ECI) ajanga metedaktsü.

Külen, ruling BJP-i menden 2 nung dang takok angu aser Bihar nung menden ka Independent candidate kati takok angu.

Congress-i assembly by-election results atema tenüng sang with Leader of Opposition Rahul Gandhi-i ashi.

Gandhi-i "BJP ajanga tetsübu aser tiyazü tasa atongba raksago" ta ashi.

"India nungeri Constitution aser democracy kümzükogo.

Linük nung senzüka yutsürtem

aser sensakertemi parnok

temeten kümzüktsü atema

INDIA den noktakogo.

Teyariteper telok ajak aser

Congress züngsemtem nem

tenüng sang agütsür" ta Rahul

Gandhi-i ashi.

nisung kati yimsüuba samatsünür aser temeten nem yimsü südaktsünür" ta Rahul-isa ashi.

Congress president Mallikarjun Kharge-ia party züngsem ajak tushia "iba takok ajanga nübertemi BJP tekong merangba, tim mesüi kettangsüba aser politics tamajung magizükba sayur" ta ashi.

Bodbari West Bengal nung assembly menden 4, Himachal Pradesh nung 3, Uttarakhand nung 2 aser Punjab, Madhya Pradesh, Bihar o Tamil Nadu nung assembly menden kaka atema by-elections agia liasü.

DHD Blood Bank nung generator kanga nüngdaker: DAYO



Dimapur, July 13, 2024 (TYO): District Hospital Dimapur nung tesüba küm 3 tashi generator nung inyakertemi iba tebilemtsü malu dang Blood Bank kettangsüa arur anungji Health and Family Welfare Department (H&FW)-i tekaratiba nung teinyaktsü inyakang ta Dimapur Ao Youth Organisation (DAYO)-i metedaktsüogo.

"Taküm March ita H&FW Principal Director dangi shidi ka nung generator meshia züluogo saka tang tashi mapa kecha meinyak lir. Department-i tekaratiba nung iba onük retpangshima inyaktsü nenshir.

Iba dak sendakba nung timtem kar danga ajurura department nung inyakertemi iba tebilemtsü khuretji abentsü" ta Media Cell, DAYO-i ashi.

Dimapur nung Blood Bank ya kanga tongtipang kechiyong mapang talangka iba bank ajanga Nagaland ajunga aser Assam kübok tesem kar yaria arur. Anungji taküm kümzüktsü asoshi blood transfusion maparen ya maneni inyaktsüla aser iba asoshi power backup nüngdaker. Mapang shia loadshedding alir anungji ibala mapang tapayutsü meimchir takümtem samatsü" ta

DAYO-isa ashi.

Azü tenlabaya kanga tongtipang ta angateta DAYO-i küm aika public den osang prokshir, loktii azü tenlabaya sentong ayonga agir aser blood donors tarensen bendena yaritepa arur ta parnokisa ashi.

Dimapur nung küm ishika atongtepa tzüngluruwa aruba sülen dengue tashidak agi timtema arur. Anungji Medical Department-i ibala wara nungi nübertem kümzüktsüsa mapa meinyakra sensotemi ola adoktsü, ta DAYO-isa tekümdangtsü olen ka shiogo.

Councilor Kazhelitakok anguba atematenüng sang agütsüba sentong agi



Councilor Kazhelitakok anguba tenüng sang agütsüba sentong nung tangokba noksa angur. (Kohima, July 13, 2024)

Kohima, Chiteni/July 13 (TYO): Tawa Kohima Municipal Councilor (KMC) election nung Ward-7, Daklane nungi NDPP candidate Kazhelitakok (Ali) takok tajung anguba atema tenüng sang agütsüba sentong tanü Kruzo Park, Tsiesema Kohima nung agiogo.

Sentong nung o jembiba mapang Ali-i, party tir Chingwang Konyak, Chief Minister Neiphiu Rio aser Minister Salhouuo Kruse nungeri anir NDPP lenirtemi la candidate ka ama agizükba atema kanga plaba lemsatep.

Laisa, tetsür councilor tem dak tamang ka-a shimba ama

parnoki tamakok maludakstsütsü ta ashi. Ali-i, tetsürtem atema menden 33 mekazüka toktsür election kanga takok ngua agiba atema Rio-i aniba sorkar nem tenüng sang agüja liasü.

Kiyong indang jembiba mapang lai, kiyong lenirtem aser nübertem den longjemer meranga inyakstsü aser senotsü agütsüba ajak ochishia amshitsü tenangzükba agüja liasü.

Maneni lai, kiyong terenlok asoshi ajaki teka amteper inyaka nongita yaritsü ayongzükba liasü.

Sentong nungsa NDPP 8 Western Angami vice president Zhale Chase aser Sümi Community Daklane Kohima

Pukhalu Kiho nati Ali nem tenüng sang agütsüba o jembiba aser lar kinungertem tenüng nung Seyie-o Yiese-i tepela o jembiba liasü.

KMC mendenbuba Neizhokho Suokhrie aser Deputy Chairman Khrielievi Chüsi nati anir councilor tasentem ajak iba sentong nung shilem agia liasü.

Iba sentong ya Dr David Sachu lenisüba nung agi aser Apostolic Ministries tir Rev Dr D L Sanchu-i sarasadema tenzük aser Akali Awomi-i tepela o jembiba liasü. Kasa mapang nung Atto; Mezanuo aser Yan Mozhui nungeri ken tajung ka aten.

Maneni staff tem dang parnok mapa nendaka inyakstsü liasü.

Maneni bushisüngdang ajanga ngutetbatem DC Mon nem metedakstsüogo aser department den longjemer administration-i jenjang agitsü alibatem indang sensaksema liasü.

State NVBDCP team-i Mon semdang

Dimapur, Chiteni/July 13 (TYO): State National Vector Borne Disease Control Programme, Kohima-i July 10 nungi 12 tsüngda Mon district nung NVBDCP programme benoka inyaksangshiba asadangogo. Iba team ya Director & SPO (NVBDCP) Dr. R Chubala Aier-i anir oa liasü.

Kasa mapang nung Entomological Team-i district nung Vector Surveillance ka agiogo, kong district nung Dengue aser Japanese Encephalitis atema Vector aliba nguteta liasü. Dengue atema Sentinel Surveillance site hospital amenokogo, kong Dengue tashidak tendangtetsü.

Anti - Dengue ita (July) ayongzüka amungba mapang District authority & staff tem dang inyakstsü maparen kechisa ali iba indang metedakja liasü.

Maneni staff tem dang parnok mapa nendaka inyakstsü liasü.

CPO küm 150 ajungba benjungmung ayonger



Chakhroma Public Organisation ketdangsertemi osangbener den jempiba noksa angur.

Dimapur, Chiteni/July 13 (TYO): Chakhroma Public Organisation (CPO) tenteter küm 150 ajungba benjungmung November 9 nü Chumoukedima jila nung amungtsü.

Honibarnü osangbenertem den sensaksema mapang CPO-i ashiba agi, küm 150 ajungba nüngdem nung parnoki World Environment Day nü süngtong atemba sentong amala

dak tema lir.

Iba lokti tentet yagi ashiba agi, Chakhroma ya 1874 masüdang nungi liasü saka parnoki 1874 ya iba lokti tentet kümterba küm ama agitsü telemtetba agia liasü. Tang iba lokti tentet kübok yimtsüng 44

Kidima yimtsüng nung RCH camp kaogo



Dimapur, Chiteni/July 13 (TYO): Chief Medical Officer, Kohima office den District Health Society, Department of Health & Family Welfare, NHM nunger longjemer July 12 nü Kidima yimtsüng nung Reproductive Child Health (RCH) camp ka ayongzükba agiogo.

Camp tezüka sentong tatsüka agi, koba Khrievotsonuo, CHO, Kidima HWC lenisüba nung agia aser Deaconess CRC, Kidima village Alenu Sachu-i sarasadema liasü.

Sentong nung Dr. Khrievilhou Nakhro, DPO (RCH/UIP)-i Reproductive aser Child Health koda tongtibang iba onük dak rangloker jembiba. Iba camp ya tetsürtem, kinü tanur aser tanurtem mortality rates tajemba kümdakstsütsü nükjidong nung ayongzükba agiogo. RCH services package ajanga, Anemia nokdakstsü aser anepalutsü, training shitak agir aliba nisungtem tanur sotsütsü, mozükitem nung tanur asotsü atema ajungshitsü, Antenatal (ANC) care aser tanur asoba mapang timtem ajangshibatem

ajak jelia puteta anepalusütetsü.

Paisa, tanurtem aser mashisa aliba tetsütem dak rangloker iba jenjang ya agir ta ashi. Dr. Khrievilhou Nakhro-i, lokti-i shilem agitsü koda tongtibang iba indang lemsatepba den Village Health & Nutrition Day atema JAS/VHC-i achaayangtsüla ta ashi.

Pai ashiba agi, awareness generation demand ajanga IMR & MMR tajemba kümdakstsüogo, aser health camp tem ya Department of Health & Family Welfare-i agütsüba service tem agitsü atema sabang tajung ka lir. Pai iba sentong nung shilem tajung agiba atema sentepa alir ajak dang kanga pelaba lemsatep.

Maneni Dr. Khrievilhou-i, RCH camp atema mozü agütsüba asoshi Nagaland Medicine Dealers Association (NMDA), CMO Kohima & Dy.CMO, Obs & Gynae, Dr. Ayo Tha-o & Viswema CHC team, Pediatrician, Dr. Akatoli from Chiephobozou CHC, SMO Viswema CHC & MO Jakhama PHC, DPMUs & NVBDCP, BPMUs, Kezocha PHC nungi Health personals,

Sakhabama CHO & team aser CHO & team Kidima HWC nunger dang kanga pelaba lemsatep.

Kasa mapang nung Jakhama block kübok at Kimipfuphe PHC, Jakhama PHC aser Viswema CHC nunger ajak kasa mapang nung asadangogo. CMO, Kohima, Dr. Leamnyei Konyak & Dy.CMO, Dr. Imchatoshi den Medical officers in-charge-i anir team kati iba inyakyim ya achaayangtsüla ta ashi.

Ajak sentepa iba camp nung yimdaklir parnok 81-i shilem agi. Ajak sentepa ANC - 21, IUCD insertion - 5, General medicine case - 34, Child Immunized - 8, Pediatrician - 26, Laboratory test - 56 where RBS - 27, NCD screening - 53 liasü aser parnok rongnung ana dak Hypertension aser Diabetes puteta liasü.

Maneni camp mapang lab test sütsüba den Condom lemtsü aser angati mozü agüja liasü. Ano IEC pamphlets aser leaflet tem angati lemja liasü.

inyakyim ka benokstsü aser lanur piano atemertem music nung tamendakdak takang yanglutsü kodang tongtibang iba indang tangazükba agütsütsü atema lir, ta ashi.

Workshop ya Music Reading & Effective Strategies, Performance aser Exam Preparation, Anxiety & Memorization ta shilem asem kümä lemsar agi, koba shisalen sayur Zeu Libemo-i tatongi agia tangazükba agütsütsü.

Workshop ya Molungenenla Longkumer lenisüba nung agi aser laisa tepela anküp o jembia liasü.



July 13, 2024 nü New Delhi nung AAP lenirtem- Sanjay Singh aser Sandeep Pathak nungeri Punjab kubok Jalandhar West Assembly by-election nung party-i takok anguba atema benjungtepang tangokba noksa nung angur.

New Delhi nung US-India Defense senden amen

New Delhi, July 13 (Agencies): New Delhi nung 'U.S.-India Defense News Conclave: Stories of U.S-India Defense & Security Partnership' senden nung jembidang U.S. Ambassador to India, Eric Garcetti-i, India-i United States den tarutsü jenjang angur aser US-ia India den tarutsü jenjang angur, ta ashi.

India aser US partnership nung commerce, technology, nüburtem aser security ji tongtibangtiba ontüktem lir, ta paisa metedaktsü.

U.S.-India Defense News project "Dialogues on Deliverables to Deliveries" tatembangbuba sentong nung okila jembidang pai, "Asenok tsüngda tesendaktep ya antokdangba masü; iba ya tenangzükba ka. Iba ya takok anguba mesüra tamakok anguba asaya ka masü saka meyipa angutsü kecha meimlai kati ka dak tamang katetba lir. Kodang asenoki asen tembartem den külemi longjemer nokdakdir asenoki shidak agi tashi rangloker inyakba den külemi

democracy linük tulutiba ana longjemdir ibaji ajanga alima nung yimjung atema lenmang sayuba tesangwa ka ama asenoki tangatetba tajungtem benshiba sayur," ta ashi.

Ambassador Garcetti-isa, "Onok (United States) nenok (India) den mapang talangka alitsü aser asen lenirtemi technology, defense, start-ups, tech & space nung longjemer inyaktsü atema bangjemogo. Onoki India ji onok rong yanglushitsü, mapa bushitsü aser kati ka indang systems meteta training agitsü atema onok aruba tesem ka kümdaktsüner," ta ashi.

Paisa, "Iba tesendaktep ya tilateri masü; iba tesendaktep ya kiyimba ama züngshia meranga inyaktsü nüngdaker," ta metedaktsü.

Kasa senden nung jembidang International Cooperation, Ministry of Defense, Govt of India, Joint Secretary, Vishesh Negi-i, "India aser US na ya Aso 21buba nung natural partners lir. Iba partnership kubok defense & security nung kümdaktsütsü. Kodang

region nung tashi itta aliba ajungketsütsü aser India o US naprongla azükarutsü atema inyaker," ta ashi.

"Tang linük ana tsüngda sepaitem amalitepa inyakba jenjang tashi itta lir aser tongti kulitemji technology kasa amshiba aser Indo-Pacific region onük nung kasa tangatetba aliba lir," ta paisa metedaktsü.

Iba senden nung U.S.-India defense partnership kubok linük anaprongla nungi industry nung mongintem longjemer inyaktsü aser Indo-Pacific nung parnership tajungba akümtsü nükjidong nung tongti kettangsertemi anogo ananü (July 11-12) tashi o lemtepa aruogo.

US aser India na tsüngda defense tsütsü maneni amalitepa inyaktsü asoshi bangjema iba senden tembangogo.

U.S. Mission to India-i CUTS International United Service Institution of India (USI) aser U.S-India Strategic Partnership Forum (USISPF) den senteper Delhi nung iba senden ya ayongzuka liasü.

Kashmir Martyrs' Day nü Mehbooba aser Omar na 'house arrest' asü

Srinagar, July 13 (Agencies): July 13 nü Kashmir Martyrs' Day anogomong nung taoba mapang Jammu & Kashmir nung Chief Minister inyaker ana- Omar Abdullah aser Mehbooba Mufti na 'house arrest' asü, ta tenati metedaktsü.

Tena nem 'Mazar-e-Shuhada' mesemdangdaktsütsü atema tena house arrest asü.

Kümshia July 13 anogo nung Jammu & Kashmir nung yimtenren party balala nungi lenirtemi Srinagar nung aliba Mazar-e-semanga 1931 küm taküm bendanga agütsür nisung

22 nem akhüm agütsür. 1931 küm taoba mapang Maharaja'er sepaitemi longkak aiter nisung 22 khaseta liasü.

Peoples Democratic Party (PDP) nung tongti lenir, Mehbooba Mufti-i lar kikümbang shibanga yutsüba noksa ka lemsatepa X ajanga, "Kashmir-i tashi tali amshirtem anema nokdakba aser tim masüba anema nokdakba tematisü-Mazar-e-Shuhada küm nem mesemdangdaktsütsü atema ano ozü ki shibanga yutsügo. Kashmiri nunger taneli tepeletsü makok, ta taküm tenla

agütsürtem ajanga kuli agütsür," ta metedaktsü.

National Congress nung tatong Tir, Omar Abdullah-ia, nüburtem nem akhüm magütsüdaktsütsü atema police tali lemzüksü, ta shia sorkari aitsü.

"Ano July 13, Martyr's Day anogomong ka, ano kishi shibanga yutsüba tatalokba ka. Linük tesem ajaklen nüburtem item nisuntem nem akhüm agütsüner saka J&K nung administration-i item ama taküm tenla agütsüba mezüngshiner," ta pai metedaktsü.



July 13, 2024 nü New Delhi kubok Civil Lines anasa Khyber Pass nung ozüng alema asüba kiojentem bendoktsüba mapang police-i anükba noksa nung angur.

By election nung INDIA bloc-i menden 10 angu; NDA-i 2 dang angu

New Delhi, Chiteni/July 13 (Agencies):

Tawa state tenet kubok assembly constituency 13 nung by election agiba sülen Honibarnü vote zünga osang sangdongogo.

Opposition INDIA teloktep menden 10 tashi nung takok angu aser BJP-i aniba NDA-ibo menden ana nung dang takok nguteta liasü.

Assembly menden 13 nungjagi Congress-i Uttarakhand kubok Badrinath aser Manglaur menden na aser Himachal Pradesh kubok Dehra aser Nalagarh menden na nungi takok angu. Dehra nung Congress-i Chief Minister Sukhvinder Singh Sukhu kinüngtsü Kamlesh Thakur toktepdkja liasü.

Opposition INDIA teloktep nung densema aliba AAP-i Punjab kubok Jalandhar West menden nungi takok angu.

Election Commission of India (ECI) data ajanga ashiba agi, INDIA teloktep nungi TMC-i West Bengal kubok menden pezü- Raiganj, Bagda, Ranaghat Dakshin aser Maniktala nung takok angu aser DMK-i Tamil Nadu kubok Vikravandi assembly

constituency nungi takok angu.

Bihar nung Rupauli menden nungbo independent candidate Shankar Singh-i takok angu.

Tanüngba menden anaji BJP-i angu. Himachal Pradesh kubok Hamirpur menden aser Madhya Pradesh kubok Amarwara menden nung BJP-i takok angu.

West Bengal, Uttarakhand, Madhya Pradesh, Himachal Pradesh, Tamil Nadu, Punjab aser Bihar state tem nung July 10 nü assembly menden 13 atema by election agiba sülen Honibarne 8:00 ako nungi tenzüka vote zünga election osang sangdong.

Lok Sabha election agia Centre nung sorkar tasen tentetba sülen tang mezüng BJP-i aniba NDA aser opposition INDIA teloktep na tsüngda assembly by election nung toktepogo, ajisiüaka iba election nungbo opposition-i takok tulu angu.

By election nung vote agütsürtem aika liasü. Election anogo nung Uttarakhand aser West Bengal na nung rara tera adokba dak alaka tesem aika nung election tesüne nung agiteta liasü.



July 13, 2024 nü New Delhi nung Jharkhand Chief Minister Hemant Soren aser pa kinüngtsü, Kalpana Murmu Soren nati Congress lenir, Sonia Gandhi ajurudang tangokba noksa nung angur.

UP nung nung tzümetüng agi yim 700 kongshiogo

Lucknow, July 13 (Agencies):

Uttar Pradesh nung yim 700 dak tema tzümetüng agi kongshiogo aser Hokolbar nikongdang tashi nung ghonda 24 tsüngda tzümetüng dak sendakba lendong balala nung nisung 11 siüogo, ta state relief department-i metedaktsü.

Ghonda 24 tsüngda state nung tzünglu 7.5 mm arua liasü.

State relief department nung kettangsertemi, nisung trok tzü nung arakseta asü; kar per agi mechiseta asü aser kar tsüngi agi asü, ta metedaktsü.

Kettangsertemisa, ayong aika nung tzü tali metsüngba ajanga district 17 kubok yimtsüng 732 tzü agi metsüngbangogo, aser ibaji ajanga nisung lakh 18 dak tema timtemdar, ta metedaktsü.

Shahjanpur aser Bareilly yimtitem nunga tzü tali metsüngbangogo. Shahjanpur

district kubok Lucknow-Bareilly highway nung tzü tali metsüngbangba agi gari mesenzüteter aser Bareilly district nunga tesem aika nung gari mesenzüteter.

"Tzümetüng agi kongshiba tesemtem nung nüburtem timtem pungbatsütsü atema NDRF aser SDRF-i local administration den amalitepa yaritepdar. Tzümetüng agi kongshiba tesemtem nungi nüburtem kümzüka jenokdaktsütsü asoshi onoki relief camps aika amenokogo," ta State Relief Commissioner, Naveen Kumar-i metedaktsü.

Brihostibarnü Uttar Pradesh chief minister Yogi Adityanath-i helicopter nungi tzümetüng agi kongshiba district tem repranga tensa asadangba sülen pai kettangsertem dang akokba tashi nüburtem yaritsü tuyua liasü.



TIR YIMYIM

YIMOBILEM (EDITORIAL)

DIMAPUR AMUNGNÜ, JULY (CHITENI) 14, 2024

Tsüngrem dak mulung alemba

Yerimia mapang nung Israel nungeremi parnok Egypt lima alar tia nungi aniteta Yihova Tsüngrem temeim aser tashi tulu to amadoker, parnoki parnok sepaitem aser parnok chubatemi tangar kintem den putepa aliba tesendaktep nungi teyari anguba ajanga Babylon nungerem akoktsü ta bilem. Atangji, parnoki parnok tebang temeli agibo Kibuba Tsüngrem dak amanger ama jembi saka parnok temulungjangbo Pa dang nungi talangka pilaadoker liasü. Parnoki Kibuba dak dang jenoker ta parnok bang agibo sarasadem saka parnok mulungjang nungbo parnok rongsen aser tashitait sepaitem dak dang temulunglemteta liasü. Ibayongji, parnoki tebang agi Kibuba Tsüngrem sanga jembiaka, parnoki inyakba mapatembo ajak Kibubai memulungbatem liasü. Iba ama mapang ka nung, Tsüngremi Yerimia ainker ajanga Israel nungerem dang, " Tasütsü tashidak tulu agi parnok asütsü. Parnok mang mayimtsü mesüra parnok maremtsü, parnok tasümangji ali tema nung jana ama alitsü. Nok agi aser ayawara agi parnok samatsü aser tasümangji anüng ozü aser arem shirurutem asoshi chiyongtsü alitsü," ta metedaktsüba Yerimia tapu 16 nung shia angur. Ano, iba sülena Tsüngremi Yerimia danga, " Shibai nisung dak amanger aser pei temang shi tashi aitba dak temulung alemer, shiba mulung Kibuba nungi pilar, pa atakatem asütsü," ta Yerimia 17 nung shia aliba asenoki angur. Asenok asoshi mapa ajak nung temulung lemtetba ya kanga tongtibang lir. Temulung lemtetbaji temoatsü aruba lenmang aser tasü aittsu tashi angudak tesem ka lir. Aji oda, asenoki Tsüngrem dak dang temulung alemer ta metettsü ? Yerimia mapang Israel nunger amaji pei metetba, akaba aser tashi nung tangar dang tajungba, takaba, temetetba aser tashi tuluba amato küma alidang, asenoki tebang agi Tsüngrem tashi indang jembiba ama asen mulung aser mapa agia Pa dak temulunglemteta ajemalua liteter asü ? Asenok tetsübu aser timtem nung alidang shiba dak jenoker ? Asenok jashidang aser shirang dang shiba dang ashir. Asenoki tebang agibo Tsüngremi dang akoktsü aser Pa dak dang temulung lemtetter ta jembir saka asenok timtem aser shisabolu mapang nungbo asenoki tangar dakang temulung telemtetba akümer asü ? Atangji, asenok timtem aser shisabolu mapang nisung kar nungi dang teyari angutsü, kechiyong asenoki ngua Tsüngrem asenok dangi marutsü. Aji oda, aiben, Tsüngremi asen dangi tangar nisung ka kümer arutsü. Itemji asenoki meteta aliba medemer, kinunger, kiyonger mesüra yimtsür yimer asütsü akok mesüra asenoki kodanga majurudang aser memetetba nisung ka nungiang teyari arutsü akok. Item teyaritemji ajanga asenok temoatsü aser takok angudang, asenoki shitakba maotsüsang Tsüngrembo amadoktsüa akok. Asenok atema tekümdangtsüji aji lir. Asenok meshimetsür jenjang nung alidangbo asenoki Tsüngrem dak dang metaloker, Pa dang dang asüngdanga kechiarina inyak. Ajisüaka, kodang asenok taküm aser kibong tera anisüngzüleni aru, asenoki Tsüngrem dak masü nisungtem dak dang amangtsü tenzüker. Teyari aser temoatsüji Tsüngremi agütsür masü saka nisungtem jagi agütsür amai bilemer. Ajisüaka, nisungtemjibo tenyatenponger ka dang lir saka tagütsüsang aser teyoksangjibo Tsüngrem lir. Israel nungeremtem parnok anitetba aser moatsüba Tsüngrem dak temulung alemtsü melen parnok chuba aser sepaitem dak dang temulung alem. Iba jagi Babylon nungerem Yirusalem tonga makyonga aruba mapang tashi nunga Israel nungeremtemi Tsüngrem dang nungi teyari aser tekümzükba memeshi, kechiyong parnoki parnokji kanga tashi itta lir ama bilem. Aji oda, parnoki Tsüngrem nungi teyari bushitsü bilemdangbo menuadoker liasü. Tanüa asenok aikati pei akaba aser metetba nung temulung lema alitsü akok, saka Laishibai ashir, " nisung chir dak temulung telem, kechiaser pa tanüla oadoktsü aser ali akümtsü aser iba anogo nungjisa pa sentong ajak malí akümtsü," T.Ken 146:3-4. Anungji, " Nisung dak temulung alemba dang nungibo Kibuba dak temulung alem tajungba," T.Ken 118:8.

OLEMSABANG

TANG IJIP NUNG YOSEF MEMETETBA CHUBA KA ADOK,
SHIBAI ISRAEL NUNGER ALAR TIA-i YOK (ANITET 1:8)

~ Rev. S. Temjen Longkumer, Chümuokedima.

Syria aser Kanan lima nungi Semetic Tribes, parnoki Ijip lima tashiyim agi madok aser küm 150 shi yimsü asü (1730-1580 B.C.). Item nisungtem dangji Hyksos ta aja. Ijip nung Israel nunger alibaji iba putu tensa nungi liasü. Ijip nung Bendanger kin kati yimsüsüba mapang Israel nungera kasa Semetic Tribe bendanger nisung asü nungi Hyksos yimsüsürtemi parnok dang meima benshi. Parnok terprangtsü téra mesüktepa liasü. Anungji Hyksos sorkari Yosef nem sorkar tematiba menden agütsü, aser Yosef daka aji inyaktsü sempet keta liasü.

Sorkar tashi (power) pa ket nung alidang Yosefi pei nüburtemji ali tajung, mopung tajung alidak Nile Delta tesem nung lidaktsü, koba dang Goshem ta aja. Idakji alidang parnok aika takar aküm aser talisa nütsüng yongsük kanga renloka ao. Saka Israel nunger Bendanger Hyksos yimsüsüba kübok jangratema alibaji küm 150 shi dang liasü (1730-1580 B.C.). Israel nunger Ijip nung küm 430 ali ta Anitet 12:40 nung angur. Anungji Israel nunger Ijip lisopur kübok alar tia nung küm 280 liasü ta angateter 150 280-430).

Tang Yosef memetetba Chuba katı Israel nunger alar tia-i yokbajı Yosef sur küm aika sülen atalok. Farao chuba shibai Yosef memetet, paji Ahmoses 1 liasü ta otsü meteteri ashir. Hyksos kin Ijip nungi aridokba mapang Ahmose 1 chuba mendeni atu ta ashir. Aser pa nungi tenzüker Ijip chuba aika melentepa aodang parnok kübok küm aika Israelpur alar Jenjang nung yutsü. Aji oda küm aika alar tia nung alidang tashiyim agi kangshia inyakdaktsüba, tongtibangsa Farao chuba asoshi Tsük rizüngdak yimti tulu ana Pithom aser Ramses yanglu. Ano ajongli agi lungru (bricks) yangludak kangshia inyakdaktsü (Anitet 1:11-14).

Küm aika alar jenjang nung lia arur tesüa pei nübur kümzüktsu Tsüngremi nisung ka adokdaktsü. Shiba alar chir süaka, Tsükchir chubar kidang memeteti mesütet. Aser idakji nübur anitetsü shisatsü tulu angazük. Kodang Mosa tain aküm pai pei nübur alar tia nungi anitet aser alemlı tetsü-tebou dang nangzükba Kanan limal anir aotsü apuso.

Alemlı mapang nungi Ijip aser Kanan tsüngda shishilembaba lemang yanglur iba nungi senzüa liasü. Iba lemangji kanga talangbo masü. Saka Mosai iba lemang nungji pei nübur anir aotsü memulung, kechiaser iba lemang nungji tesem aisü nung Ijip nunger sepai out-post aser gate (sungkum) aika yanglua liasü. Iba lemangji Ijip nunger ket nung liasü. Iba lemang nungji jajadang Ijip sepaitemi timtem aiben agütsütsü ta Mosai meteta liasü. Anungji Mosai lemang balakalenı aotsü shimtet, koba terben agi talangba aser tamajungba. Ita ishika agia jajar Kanan lima atongtsü melena küm aika jaja. Ibayongji tashikar, aturara merijangsa aika Ijip nungi apuso saka lemang nung parnok ajak arishi tembangadok. Parnok tanishir tulutiba (national leader) Mosa-a lemang tom nung sama. Ijip nungi apusor nisung ana (2) agi dang Kanan lima atong. Tenaji Kalib aser Yehusua liasü. Israel nunger Kanan lima tonga arurtemjibo lemang tom nung soa intetertem shir arishi kum 10, 20, 30 aser 40 liasü item lanu- asensor tem tang tobou Abraham dang langzükba limaji atong/angu. Alima meimchir otsü nung angatetsü makokba tatalokba tuluji ibaia ka asütsü südi. Iba tatalokba otsü ya Laishiba kaket 5 sünga zülua lir (Anitet, Levi, Züngdangba, Tazüngkunem aser Yehusua). Tatalokbatem tera rajemtsü/metetjemtsü asoshi historical point of view tatsüka lemsateper.

(Source: Werner Kellert The Bible As History)

Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazünge ri angateta agitsü mepishir

Arogo lenirtemi PM Modi ajurua Khristantem tebilemtsü lemsatep



July 12, 2024 nü New Delhi nung Catholic Bishops' Conference of India (CBCI) Tir, Archbishop Andrews Thazhath den Arogo lenirtemi Ato kilonser, Narendra Modi ajurudang tangokba noksa nung angur.

New Delhi, Chiteni/July 13 (Agencies):

July 12, 2024 nü Arogo lenirtem teshimtet telok kati India Ato kilonser, Narendra Modi ajurua linük nung Khristantem anema inyakba kanga bulua akümbe atema tebilemtsü balala lemsatepogo.

Trichur nungi Archbishop aser Catholic Bishops' Conference of India (CBCI) nunga Tir, Andrews Thazhath leniba nung Arogo lenirtem kar aser Kerala state nungi BJP MP, Suresh Gopi nungeri Ato kilonser ajurua senden minute 45 shi amen.

New Delhi nung CBCI office nung osangbenertem den jembidang Thazhath-i, "Ato kilonser indang office nung minute 45 shi senden amendang Ato kilonseri onoki ashiba ajak tenok-tenoka angaogo," ta metedaktsü.

Arogo lenirtem jagisa temepishiba shidi ka agütsü. Shidi nungji India nung Khristantem anema inyakba kanga bulua akümbe, Khristantemi tangartem Khristan yimsü dangi meyipdaktsür ta tiyazü nung tai tongloksüba aser anti-conversion ozüngtem tim mesüi amshia Khristantem anema

inyakba indang metedakja lir, ta Thazhath-i ashi.

Arogo lenirtemisa Modi dang linük nung minorities aser Khristantem amokmerenba nokdangsü atema inyakdaktsüner, ta mepishi.

Temepishiba shidi ajangasa sorkari scheme balala ajanga sensakertem nem teyari balala agütsüba ajakji Dalit Khristantem nem ang agüjang ta mepishi.

Dalit Khristantem anatsülen nungi takoksa ajurur, kechiyong society-i Dalit nungertemji tekubokba kin ka ama sendoker aser sorkaria Dalit nunger nem teyari magütsür, ta kasa shidi nungji shia lir. Iba dak sendakba nung Arogo lenirtemi Dalit Khristantem nem reservations agütsütsü atema sorkar nem mera agia inyakdaktsüner, ta mepishi.

Arogo lenirtemisa sorkar dang sorkar mapa aser shisaliok rejutem nung tribal Khristantem nem reservation lemzükja alibaji magientsü mepishi.

India tesem aika nung Hindu teloktemi, Dalit Khristantem tribal yimsü toktsüogo, anungji parnok nem reservations aser scheme balala kubok teyari magütsüla, ta akhanger.

Kasa shidi nungji National commissions for minorities aser minority educational institutions nung Khristantem züngsema mali, anungji sorkar indang ministries aser departments balala nung temsüa aliba Khristantem shimodaktsüner, ta mepishia lir.

Arogo lenirtemi Ato kilonser Modi dang, Khristan melunget telok balalai loktiliba tenzüker aser sensakertem tenzüker, ajisüaka sorkari FCRA license renew mesütsüba ajanga Khristan melunget telok aika timtemdar, ta metedaktsü.

Kasa shidi nungjisa, linük nung Khristantem shisaliok, healthcare aser loktiliba tenzükba nung tongtibang shilem agia aruba metedakja lir.

Tongti putir, Thazhath-i Modi dang Pope Francis India-i jaoktsü mepishi, ajioda Modi-i pai Pope Francis anaben tashi jaokogo, ta metedaktsü.

Ato kilonser Modi ajururtemji Thazhath den Bathery nungi Bishop Joseph Mar Thomas, Delhi nung Archbishop Anil Couto Bishops' conference nung tatong Tir aser Mathew Koyickal Bishops conference's deputy secretary general nunger liasü.

ANOGO ABEN TSÜNGREM DEN

AREMZÜKA SARASADEMBA TAMANGTIR

Ajiang, shiri aremzük parnok dang asenoki temoatsüba ta ajar. Yobi aremzükba indang nenoki angashiogo, aser Kibubai tatem nung pa dang koda yari. Kechiasese Khubaji aria bilemba aser yimliblem agi sünga lir... tek. 15 Tamang sarasadem agi shirangbaji aneptsü aser Kibubai pa mesotsü; aser pai temenen benshia alinunga aji pa dang adoktsü... Temeshipuri sarasademba aser inyakba nung tashi lir. Yakob 5:11, 15-16

Yakob 5:11 nungi tatem tashi nung Tejen Lai nungi tamangtir aser Tsüngrem tenzüker ana indang shisema lir. Mezungbuba nung Yob tamang takang pai pa timtem nung aremzük aser menemnem. Pa rongsen ajak samadang aser chirnur ajak asüdang Tsüngrem dak dang tamang ayu. Tatalaba arudang tamang manokshi. Aremzük Tsüngrem dak dang tamang ayu aser Tsüngrem dang ata.

Tanabuba nung Israel Chubai par Tsüngrem toktsür bendanger Tsüngrem yanglua külem. Tsüngrem tejashiba parnok madak liasü, aser ainkar Elija-i akang akanga sarasadem, aser küm asem ser ita terok Israel lima nung tzünglu maru. Aser pai tanaben Tsüngrem dang bendanga agüja sarasadem aser tzünglu yok, aser ali-i pei tejang tangtsü.

Temeimbatem, Tsüngremer chir ka ama tamang ka-a tamanger shiai sarasademtsü kanga nüngdak lir. Tsüngrem den tesendaktep tajung ayutsüla. Tsüngrem tonga sarasademtsü kanga tongtibang. Tera ka dang masü, saka bendanga agüja sarasademtsüla. Tsüngrem dak dang ata-a asen tamang yudi. Amen.

Allahabad High Court-i Khristantem nem tai tongloksü: AC Michael

July 12, 2024: Uttar Pradesh nung Allahabad High Court-i, tamangba yimsü temeden agütsüba tetezü nisung ka tamangba yimsü meyiptsü atema temeden agütsüba masü, ta shia anti-conversion ozüng kubok tai tonglokja alir Khristan kati mepishiba bail magizük.

Uttar Pradesh nung anogo ter tsüngda tang agi tanabenbuba Allahabad High Court-i kasa obendang agütsür. UP nung anti-conversion ozüng kubok tawa Khristan 17 pua liasü.

Jail nung puoka aliba Khristantem bail atema yariteper Khristan lenir kati, "Kodang iba ama high court kati maneni iba ama obendang agütsüdir jail nung alirtemi lower court nung taochi mangutsü," ta

metedaktsü.

"Iba ya tebilemtsü onük tuluka lir," ta paisa metedaktsü.

Shriniwas Rav Nayak-i bail temepishiba ken o agütsüba sülen July 9 nü iba ken o angadangba mapang Justice Rohit Ranjan Agarwal-i, "Tamangba yimsü indang nije temedenji senteper yimsü meyipdaktsütsü atema temeden masü," ta shia Nayak nem bail magütsü.

July 1 nüa Agarwal-i Kailash nem bail magütsü aser tamangba yimsü meyipdaktsüba yimsü telok ajak anenjang, ta tetuyuba agüja liasü.

Tang Uttar Pradesh nung Bharatiya Janata Party (BJP) sorkar lir.

Kanga tekubok jenjang

nung alir Dalit nungertem aser tribal nisungtem Khristan yimsü dangi meyipbaji Hindu teloktemi anemer.

Talisa Rashtriya Swayamsevak Sangh (RSS)-i India nung Arogotemi sensakertem tenzüka missionary mapa balala inyakba anema nokdaker.

RSS-i linük tesem ajaklen Dalit nungertem aser tribal nisungtem tanaben Hindu yimsü dangi meyipdaktsütsü atema inyaker. Nütsüng billion 1.4 aliba India linük nung nütsüng shilem 25 shibo Dalits aser tribal nisungtem lir.

July 1 nü Justice Agarwal-i, "Uttar Pradesh state tesem ajaklen Dalit nungertem aser lisopurtem aika ozüng alema Khristan

yimsü dangi meyipdaktsüba tongtepratepa jembidar, ta iba court-i metetogo. Iba ama inyakyimji melara kenü anogobo majority nisungtem minority akümtü," ta metedakja liasü.

Iba dak sendakba nung United Christian Forum (UCF) nungi AC Michael-i, "Iba ya legal onük ka lir, anungji legal tsütsüla nungi dang inyaktsü nüngdak," ta ashi.

July 11 nü osangbener den jembidang AC Michael-i, Court-i Khristantem anema tai tongloksüba tebilemtsüji onoki lemsatepogo. Ajisüaka ibaji teperi masü, kechiyong court-i parnoki jembiba oji ano magien," ta metedaktsü.

Paisa, onoki senior lawyer tem den

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.

.</p

AO OSHI ANGAZÜKDAK:**TANÜ ANGAZÜKTSÜBA OJANG****Tajepba**


(adj) temulung raksaa nüktzü alu (weep)

* Kotak nungbo tajepba malitsü.

Tajepba

(v) teka agi menüngsaba (mix by hands)


* Nagaland nung tajepba yi angur.

OLONG PAITEP # 6845**TIPLÉN**

- | | | | |
|--------------------------|-----|--------------------------------|-----|
| 1. 0 jembitsü tashi | - 8 | 1. Tepok telung nung shilem ka | - 7 |
| 5. Sünjang tapu ka | - 5 | 2. Tamajung aküm | - 5 |
| 7. Tekanük nung enokba | - 5 | 3. Chi den külemei achiba | - 3 |
| 8. Teka amtep | - 5 | 4. Meimchir alimai aruba | - 3 |
| 12. Tzük asendak | - 5 | 6. Laishiba nung ayong ka | - 4 |
| 14. Tsüngpang tema aliba | - 5 | 9. Tarutsü nüklä | - 7 |
| 15. Ken atenba yimya | - 5 | 10. Tamendakdak/Nükjidong | - 4 |
| 16. Asangur | - 8 | 11. Tenük-telen mejungi aküm | - 5 |
| | | 13. Terok nungi adokba | - 3 |
| | | 14. Meimchir telemsa | - 3 |

OLONG PAITEP # 6844 TELANGZÜBA**TIPLÉN :**

- | | |
|--------------------------------|-------------------------------|
| 2. Benja, 4. Tamet, 5. Wabong, | LANGTSÜNGLEN : |
| 6. Benden, 10. Khuret, | 1. Amo, 3. Jana, 4. Tembar, |
| 12. Temeim, 14. Semtu, | 5. Wangküm, 7. Dokan, 8. Khu, |
| 15. Tenya. | 9. Petinu, 11. Bere, 13. Ama |

NAI-A YA METETTER MA

Australia tsür Jessica Hull-i Diamond League nung Women's 2,000m otsü tasen ka yangluogo. Jessica-i minute 5 ser second 19.70 nung 2,000 metres asemtet aser Burundi tsür Francine Niyonsaba-i 2021 nung yangluteta aliba record (5:21.56) ajangtetogo.

CYMA-i Cyclone Remal ajanga takoksa angurtem yarir**Aizawl, July 13, 2024****(Agencies):** Central Young Mizo Association (CYMA)-i Cyclone Remal nung takoksa bentsür aruba ajurur nem Rs 56,54,000 teyari agütsüogo.

July 13 nü Central YMA Hall, Tuikhuatlang, Aizawl nung sentong ka agidang teyari agütsü.

Central Young Mizo Association ya Mizoram nung NGO tulutiba lir aser General Secretary

Prof. Malsawmliana-i o jembidang ashiba agi "Mizoram nung cyclone Remal ajanga nisung 37 taküm sama. Tasürtem rongnung Mizo

nunger 29 aser nonlocals 8 nem Rs 30,49,000 agütsü. Iba teyari ya parnok kiojen ajunga raksaba atema lir aser rongsen samaba report 18 atema Rs 1,80,000 agütsü.

Central YMA-isa public cemetery 16 raksaba osang angashi aser iba atema public cemetery 4 shia nem Rs 50,000 aser public cemetery 5 shia nem Rs 30,000 agütsüogo.

CMYA-isa Hlimen Relief Camp yanglutsü atema Rs 1,00,000 tenla agütsü.

Mizoram nung May 26, 2024 nü Cyclone Remal süidang district aika nung teraksa jenti bentsür aruja liasü.

Manipur-i train ajanga jang bosta 18,000 bener aru**Imphal, July 13, 2024****(Agencies):** Manipur nung tensa mejungi liaka Centre sorkari National Food Security Act (NFSA) kubok civil supplies lemzütsüogo.

Honibarnü train takdang 15 nung jang bosta 18,000 bener aru Khongsang Railway Station tonga aruogo.

Northeast Frontier Railways (NF Railways) kubok Food Corporation of India (FCI)-i jang bener aru.

Iba train ya Punjab nungi jang 950 metric tonnes bener aru.

Khongsang Railway Station nung sentong ka ayongzüka agidang Manipur Chief Minister N Biren Singh-

i jang bener aruba pelaa agizük.

Iba ama tensa ka nung civil supplies maneni yokba atema kanga pelar ta CM Biren Singh-i ashi.

Khongsang railway station nungi Imphal tashi NH 37 ajanga jang bener aotsü. NH 37 ya Imphal nungi Jiribam ajanga Silchar tashi lir.

MRD-i Assam nem Rs 378.68 crore lemzütsür**Guwahati, July 13, 2024****(Agencies):** Centre sorkari Northeastern region nung infrastructure ajungkettsü osang metedaktsüogo. Iba

nung Assam nung gari lenmang 78 aser apu 14 yanglutsüba dena lir.

Ministry of Rural Development-i Assam nung gari lenmang kilometre 563.67 aser apu 14 yanglutsü atema senotsü lemzütsü.

Pradhan Mantri Gram Sadak Yojana (PMGSY) - III

kübok Rs 378.68 crore endoka gari lenmang aser aputem yanglutsü ta Ministry of Rural Development-i metedaktsü.

Iba tongtipang mapa ajanga healthcare, education aser markets amala essential services tajungba akümtsü. Iba

ajanga yimtsüngtem nung connectivity tajungba akümtsü aser meta talang pilar aliba yimtsüngtem aser urban centres sendakteptsü ta Ministry-i ashi.

Iba mapa ajanga economic development, trade & commerce jenjang ajungkettsü aser mapa inyaktsü maongkatem agütsütsü. Centre

sorkar indang azükaru Northeast aser terenlok India mangdang den iba ya teputep lir ta parnokisa metedaktsü.

PMGSY-III kübok mapatongtem ajanga Northeast region melenshitsü aser Northeastern state tem tali renloktsü ta Ministry of Rural Development-isa metedaktsü.

Kakching nung yi tamajung ajemba sülen adianu 2 asü**Kakching, July 13, 2024****(Agencies):** Manipur kubok Kakching nung adianu ana yi tamajung ajemba sülen asü.

Tena ya Yengkhom Ibomcha (82) aser Y Niladhaja (74) na liasü ta jangjaogo aser yi nung


miim jemsemer asü.

Hokolbar nikongdang Kakching kubok Sambalei Pareng tesem nung lokti sentong ka nung tena asü.

Iba tatalokba nungsa Naorem Ibotommbi (75) ta ser

nisung ka kasa miim jemsemer mozü ki dang anioka anepaludar.

Lendong atalokba sülen police nem osang sangoktsü aser parnoki bushisüngdang ka tenzükogo.



Guwahati tsür Brinda Kashyap-i rhino conservation atema sempet ka nguogo. International Coordinating Council of UNESCO nung Man and Biosphere Programme ajanga la nem iba sempet agütsü. Brinda Kashyap-i Manas National Park nung rhino conservation nung yaritepba atema shimitet. Linük 11 nungi lanur scientists 15 shimitetba rongnung la dena lir.

Nigeria nung school ki ka chirep; nisung 22 asü



Central Nigeria nung anaben atongtapa yanglur aliba school ki ka chirepba noksa nung angur.

Abuja, Chiteni/July 13 (Agencies): Central Nigeria nung anaben atongtapa yanglur aliba school ki ka chirepba sülen kaketshirtem densema nisung 22 süogo, ta ketedansürtemi metedaktsü. Iba lendong atalokba sülen ki techirep nung sabanga aliba nisung 100 dak tema kümzüktsü atema tekümzükertem yoka liasü.

Plateau state kübok Busa Buji nung Saint Academy ki Hokolbarnü kaketshirtem class atema aruba sülen chirep. Kaketshirtem ya yimba arishi küm 15 tekübok liasü, ta ketedangsürtemi Honibarnü metedaktsü.

Ki chirepba sülen mezüngbo kaketshir 154 sabanga liasü, saka police otongdar Alfred Alabo-i mapang tatsüka lir ashira agi, kaketshir 132 kümzükogo aser parnok mozüki balala nung temang anepaludar.

Alabo-i, iba lendong nung nisung 22 asüba indang jangjatsüba Associated Press news agency-i sangdonga liasü. Nigeria nung media sangdong balala ajanga mezüngbo iba lendong nung 12 asü ta sangdunger liasü.

Nigeria indang National

Emergency Management Agency (NEMA)-i Facebook post ka ajanga ashira agi, nisung 30 maneni moziükidang temang anepaludar. Tekümzükba maparen tembangogo aser iba tesem merektetogo, ta kasa sangdong ajangasa mettedaktsü.

Tekümzükertem machinery tulu amshia ki chireper aliba nung sabanger alirtem kümzüktsü merang aser iba tesem nung nüburtem aika adenshir aliba noksa balala nung nguogo.

Iba lendong atalokba sülen yimdakirtem aika school ana adenshir. Parnok rongnung kar jeptepa liasü aser kari teyari agütsü.

NEMA-i ashira agi, tekümzükertem aser health worker tem den security forces tem iba tesemi yoka kaketshirtem kümzüktsü atema iyaktepa liasü.

"Medical teyari takaratiba nung agütsüsi atema sorkari moziükitem dang kuli kaket mesüra taah dak merangloki temang tama anepalutsüsi tetuyuba agütsügo," ta Plateau state indang commissioner for information, Musa Ashoms-i

ashi.

School ki chirepba ya Plateau sorkari tamendakdak tashi maitsüba aser ayongkümbang nung school ki yanglur aliba dak tai tongloktsügo. Sorkari ibala ken o agi timtema aliba school tem dang school shibangatoktsü mepeshia metedaktsügo.

Africa nung nütsüngyongstük timba aliba linük Nigeria nung ki chirepba ya kanga bulua kümogo aser taoba küm ana tsüngda iba amala tatalokba ya aiben ajangshiego.

Iba amala lendong atalokba ya ketedangsürtemi, building safety regulations shitak benoka inyaksangshi masüba aser jenjang dalang oset amshira den junga anepalu masüba dak tai tongloktsügo.

2021 küm Nigeria nung Lagos kübok Ikoyi district nung ki teyangludak ka chirepba sülen nisung 45 asü.

2022 küm Lagos kübok Ebute-Metta nung asemen atongtapa tua sur aliba ki ka chirepba sülen nisung 10 asü.

2005 küm nungi tang tashi nung Lagos nung ki 152 chirepogo, ta South Africa nunger bushisüngdanger katı ashira.

Ozung alema kiyimba ken onung Khan aser kinungtsü na nem taitok agütsü

Islamabad, Chiteni/July 13

(Agencies): Pakistan nung okadak kati taoba Ato Kilonser Imran Khan aser pa kinungtsü na nem ozüng alema kiyomba

dak sendakba nung taitok agütsügo, ta par party aser okatsüri ashira.

Arishi küm 71 tain Khan aser pa kinungtsü Bushra Khan na February ita Pakistan nung election agütsü anogo ishika anunga lir küm tenet atema tepuokdaki yoka liasü.

Iba mapang okadak kati tenati Islamic temzung ozüng nung aibelenba nguteta liasü, kechiyong Bibi balaba aser tena kibong akümbsa tsüngda mapang atsüra liasü.

Ajisüaka Islamabad Additional District & Sessions Court judge Afzal Majoka-i okdak ashira agi, Imran Khan aser Bushra Bibi nati mepeshia agizükogo.

Khan'er party Pakistan Tehreek-e-Insaf (PTI) otongdar kati ashira agi, dena anema ken o benoka aliba aginogo.

2023 küm May ita Khan-i pa pusemertem rongmesoba ken o dak sendakba nung bail atema mepeshia okadak kati iba hopta magizükba sülen Khan maneni tepuokdak yua lir.

Iba ita tetenzüklen UN panel kati Khan sota ayuba ya temzung ozüng kübok kecha tamendakdak maka, aser pa yimden yimsüba nung shilem magidaktsüsi nükjidong nung jenjang agiba ama reprangtetogo.

National election nung Khan den sendaktepa aliba candidate temi menden timba akok, saka military-i teyari agütsüba party temi parnok sorkar nung shilem magidaktsür.

Khan ya 2018 küm nungi 2022 tashi PM liasü. Military den mangatettep adokba sülen pa anema no-confidence vote

agitep aser pa PM mapa nungi atsüngtaka liasü.

Iba sülen pai general tem anema jenjang agi tenzük, shirnoki Pakistan küm aika yimsüba süa aruogo. Paisa pa tepsettsü meranga yirutsüba atema military aija liasü.

Ajisüaka Khan anema ken o aika benokba sülen pa yimden yimsüba nung shilem magidaktsüsa aküm, koba mongintemi ashira agi, military inyakyim lir.

Khan ya mezüng 2023 küm May ita apu aser iba ajanga linük ajunga nung PTI pusemertem longkak aita liasü. Pa pusemertem karibo military facility dena maka liasü.

Iba maongka ya agia sorkar aser military-i PTI lenirtem aika pua liasü.

Lahore yimi nung anti-terrorism court kati Mongolbarnü pai bail atema mepeshia magütsü, kechiyong police-i ken o bushisüngdangba sülen iba mepetmesü nung pai shilem agiba nguteta liasü. Iba mapang nungbo pa tepuokdaki yoker liasü.

PTI candidate tem February 8 nü election nung independent candidate tem ama toktepa liasü. Yimden yimsüba nung mepetmesü adoker aliba ajanga iba election ya menorang agi.

2023 küm August ita Khan aija apuba ajanga pa election nung metoktepettsüsa aküm aser pa linük yimtiba Islamabad kübok Adiala Jail nung puoker liasü.

Ajisüaka PTI party nungi candidate tem shirnok independent ama toktepa liasü, parnoki tanga party dang nungi menden timba akok.

Menden timba koka parnok nem military den sendaktepa aliba party temi tenokdangba agüja liasü.



Taoba küm tir candidate Fernando Villavicencio tepsetba atema Ecuador nung ozüng alema inyaksanghiba telok tulutiba ka nungi züngsem pongu tepuokdaki yokogo. Villavicencio ya linük national assembly züngsem ka aser taoba mapang osangbener ka liasü. Pa August ita linük yimtiba Quito nung nüboyimba sentong ka nung shilem agir aoba mapang khaset. Villavicencio tepsettsü atema tetuyuba agütsüba atema Los Lobos gang lenir Carlos Angulo aser Laura Castilla na küm 34 aser ita ti atema tepuokdaki yokogo. Lenla balala nung teyari agütsüba atema tebur ana aser tetsür ka küm 12 atema tepuokdak ayutsü obendang agütsügo.

Israel-i Gaza nung Palestine nunger 71 tepset

Gaza, Chiteni/July 13 (Agencies): Gaza nung Hamas indang health ministry-i ashira agi, Israel-i anüng ajanga humanitarian maparen atema atakzüja aliba aliba tesem ka amakba sülen Palestine nunger 71 tepsetogo. Israel-i ashira agi, parnoki Hamas pur lenir tejen ka dak rangloker iba tesem maka liasü.

Iba lendong nung nisung 289 yiruogo, ta health ministry-isa metedaktsü.

Hamas puri ashira agi, Israel-i Khan Younis anasa al-Mawasi tesem maka liasü, koba Israel military-i humanitarian zone ka ama mekazüka tokja lir aser Palestine nungertem dang iba tesem nung jenoktsü atema mepeshia metedaktsügo.

Kasa mapang nung Israel nunger ketedangsürtemi ashira agi, parnoki Hamas indang military wing tekolahka,

Mohammed Deif amak, kong civilian tem maliasü aser Hamas pur kiralongrartem dang liasü.

Khan Younis atema Hamas commander Rafa Salama daka rangloker iba jenjang agia liasü, ta ketedangsürtemi ashira den itangitertemi osang tejangja agüja iba jenjang agiogo, ta shisem.

Ajisüaka Hamas puri ashira agi, parnok lenirtem dak rangloker iba tesem amak ta ashira ya tai lir.

"Israel-i Palestine nunger lenirtem dak rangloker tesem balala amaker aser mapang tatsüka lir teyazü asüba ya tang mezüngbuba masü," ta Hamas puri ashira.

Israel Ato Kilonser Benjamin Netanyahu-i security dak sendakba nung sensaksem balala agitsü, ta pa indang office sangdong ka ajanga metedaktsü.

Al-Mawasi nungi tenük kuli

agütsü kati BBC dang ashira agi, iba tesem menoknok anok ama kümber lir aser iba densem nungi video tem ajanga kiojen ajasar aliba aser tasümangtem bener aoba nguogo.

BBC World Service nung Newshour mapang Dr Mohammed Abu Rayya-i ashira agi, parnok dangi bener arurtem timba tasü dang anir arur aser tangartem kanga mejungi yirur lir.

Pai ashira agi, iba tesem molumi ama kümber lir aser asürtém aika civilian tem lir, kong tetsür aser tanurtem densema lir.

Kuwait field hospital nungi video tem ajanga yirur alirtem ali nung temang anepaluba nguogo.

Bodhbarnü Israel military-i Gaza yimi nung alirtem dang central Gaza Strip nungi south leni aotsü tetuyuba agüja liasü.

Paris Olympics nung PV Sindhu group tajung kanungataogo



PV Sindhu

Paris, Chiteni/July 13 (Agencies): India nunger Olympic medal ngua alila PV Sindhu aser HS Prannoy na July 26 nungi tenzüksü aliba Paris Games nung group temela atatsüogo.

Rio Games nung silver medal ngur Tokyo Olympics nung bronze angula Sindhu ya seeded 10 nung lir.

World number 13, Sindhu ya Paris Olympics nung tetsür kija badminton asayaba Group M nung ataogo, kong Estonia tsür Kristin Kuuba (WR 75) aser Maldives tsür Fathimath Nabaaha Abdul Razzaq (WR 111) nunger lir.

Olympic medal tasembuba angutsü temulungtetba nung alila Sindhu ya group temela ka nung liaka round of 16 nung lai China tsür seed trok buba He Bing Jiao ajurutsü akok.

Lai Jiao ajangtetra quarterfinals nung China tsür Olympic champion Chen Yu Fei ajurutsü amai lir.

Olympics matongdang arishi küm 29 tain Sindhu ya jangratema masayateti arur aser lai Summer Games nung medal tasembuba angutsü atema khenyongi balaka meranga asayatsü nüngdaker.

Kasa mapang India nunger Prannoy ya tang mezüngbuba Olympic nung asayatsü lir aser pa tang seed 13 buba nung lir, aser Paris nung tebur kija badminton asayaba Group K nung pai Vietnam nunger Le Duc Phat (WR 70) aser Germany nunger Fabian Roth (WR 82) akoktsüla.

Tebur kija asaya nung India nunger tebur tanabuba Lakshya Sen, rank 19 ya Group L nung ataogo.

Pa indang group nung Indonesia nunger world number three Jonatan Christie lir. Tena den Guatemala nunger Kevin Cordon (WR 41) aser Belgium nunger Julien Carragi (WR 52) lir.

Pei group nung Prannoy aser Lakshya na temaba tenjang tongtetra round of 16 nung tena ajuruteptsü.

Tetsür tarep asaya nung World number 19 Tanisha Crasto aser Ashwini Ponnappa ya Group C nung lir.

Tena group nung Japan nunger world number 4 Nami Matsuyama aser Chiharu Shida, south Korea nunger Tokyu Olympics bronze medallist Kim So Yeong aser Kong Hee Yong (WR 7) aser Australia nunger Setyana Mapasa aser Angela Yu (WR 27) lir.

India nunger tebur tarep Satwiksairaj Rankireddy aser Chirag Shetty ya India nunger medal angutsü asoshi tajungtiba lir. Tena ya tebur tarep asaya nung seed tasembuba nung lir.

Ajisüaka draw nung tareb asayar indang ken o Court of Arbitration of Sport (CAS) ajanga jembitsü aliba mechii Paris Olympics atema tebur tarep draw masayai thinena lir.

Badminton World Federation (BWF) ajanga iba draw asayatsü anogo ano mesangdong. Paris Olympics nung badminton ya July 27 nü nungi asayatsü lir.

WI den tanabuba Test atema Wood-i Anderson melenogo

Chiteni/July 13, 2024 (Agencies): West Indies den tanabuba Test koba taruba hopta Trent Bridge nung asayatsü lir iba asaya atema James Anderson meleno fast bowler Mark Wood shimo, ta England and Wales Cricket Board (ECB)-i Honibarnü metedaktsü.

Arishi küm 41 tain Anderson Test asaya 188buba asayaba sülen Hokolbarnü asaya nungi anenogo. Küm 21 asayaba mapang Anderson-i wicket 704 agi aser pa Test asaya nung

wicket timtiba agiba asayartem rongnung tasembuba jenjang nung lia asaya nungi anenogo, ta Reuters sangdong ka ajanga metedaktsü.

England aser West Indies na Lord's nung mezüngbuba Test asaya England-i innings ka aser run 119 agi kokogo.

Wood shiba arishi küm 34 tain lir pai tang tashi nung England team nungi Test 34 nung asayar lir aser iba mapang wicket 108 agi lir. Pa England team nungi temesma March ita India den

asayaogo.

Tanabuba Test asaya ya taruba hopta Brehostibarnü tenzüksü aser tasembuba aser tatembangbuba Test asaya Birmingham nung July 26 nü nungi tenzüka asayatsü.

England team: Ben Stokes (captain), Gus Atkinson, Shoaib Bashir, Harry Brook, Zak Crawley, Ben Duckett, Dan Lawrence, Dillon Pennington, Ollie Pope, Matthew Potts, Joe Root, Jamie Smith, Chris Woakes, Mark Wood.



Ita ka tepeyong tesem balala nung asaya aruba sülen Euro 2024 Deobarnü Berlin nung tembangtsü renemtepdar. Iba asayamung final Spain aser England na asayatsü.

BCCI-i India aser Sri Lanka na asayamung mapanglem sangdong

Chiteni/July 13, 2024 BCCI-i India team (TYO): Board of Control for Cricket in India (BCCI)-i Honibarnü sangdong ka ajanga India team Sri Lanka nung oa asayatsü aliba asayamung mapanglem metedaktsüo.

Anogo ka melenshiba sülen asayamung ya July 27 nü tenzüksü. Mezungbo asayamung ya July 26 nü tenzüksü sentong yanglur liastü.

Iba asayamung nung India team T20I asem aser ODI asem asayatsü. T20 asayatem ya Pallekele nung asayatsü aser ODI ya Colombo nung asayatsü.

Head coach tasenba Gautam Gambhir lenisüba nung India team mezüngbuba July 27, 28 aser 30 nü Pallekele nung T20I asem asayatsü, aser iba sülen Colombo-i oa ODI asayatsü. ODI asaya ya August 2, 4 aser 7 nü asayatsü.

Iba asayamung atema

Premier League nung TKR mentor Goswami Caribbean kümogo



Goswami Caribbean

management dang kanga pelar, aser ni iba asayamung atema yongya atar," ta laisa shisem.

Iba mapa agizükba sülen lai TKR tetsürtem nem teyari agütsütsü. Iba team ya all-round Deandra Dottin lenisüba nung asayadar. Dottin lenisüba nung TKR-i 2021 küm mezüngbuba WCPL koka liasü.

Knight Riders management-i team maneni akangshia parnoki bendanger asayar Jemimah Rodrigues, Meg Lanning, Jess Jonassen aser Shikha Pandey nunger anisemogo. Taküm iba asayamung ya August ita Trinidad & Tobago nung asayatsü lir.

TKR tetsür team iba asayamung nung league asaya pezü asayatsü lir. Parnok August 22 nungi 27 tsüngda Barbados Royals aser Guyana Amazon Warriors den asayatsü.

Iba asayamung final ya August 29 nü Tarouba nung Brian Lara Cricket Academy nung asayatsü.

WCPL 2024 atema TKR tetsür team:

Retained Caribbean Players: Deandra Dottin (c), Kycia Knight (wk), Shamila Connell, Zaida James, Samara Ramnath

New Signings: Meg Lanning, Jemimah Rodrigues, Jess Jonassen, Shikha Pandey.

BILEMDANGANG

"Anema dang lira mapa ajak takoktsü."